

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

November 2022

von Helen Alba

## Iwergschnappt oder bschwipst?

Die Bäsl Kathi un de Vetter Sepp ware seider Johre mitnaner verheirat. Do unlängscht han se ihre 40. Hochzeitstach ghat. Wie Männer ewe sin, hat de Vetter Sepp iwerhaupscht nit dran gedenkt. Is jo a schun e aldi Gschicht! Noh so ville Johre is des nix Weltumwerfendes! Mer losst sich als Mann ganz anri Sache dorch de Kopp gehn. In junge Johre sin se an sellem Tach immer ausgang. In Temeschwar, zur „Schari-Neni“, des war e Restaurant, wu mer gut esse hat kenne. Doch mit de Johre is dann so manches passiert, was wichticher als Ausgehn war. De Hochzeitstach is trotzdem immer gfeiert gin, wann`s a nor mit eem Blumestrauß un eener Flasch Wein war..

Die Bäsl Kathi hat e waiches Herz, is sentimentaler un hat sich schun lang vorher de Kopp derdriwert verboch, mit was se ihrem Mann e Freed mache kennt. De Tach rickt immer näkschter, nix ruddelt sich. Mit der Nas hat se ihre Mann a nit drufstuppe wille. Doch so mir nix dir nix iwer des Ereignis hinweggehn, des war die Bäsl Kathi ach nit imstand. Also is se an sellem Tach schun zeitich morjets zum Friseer gang un hat dernoh zu koche anfang, natierlich e Feschtesse. De Tisch war doppelt gedeckt, e Flasch Wein, e Blumevasn un zwaa Kerze han a druf gstann. Sie hat sich scheen angezoo un sogar die Leschpre gfärbt. Dernoh uf ihre Sepp gewart, in der Hoffnung, dass....

Doch wie de Vetter Sepp zur Tier rinkummt, reisst er die Aue uf un froot: „Weib, wie schauscht dann aus?! Es is doch nit Fasching! Ich han Hunger! Hhhm, do schmeckts awer gut!“ „Erscht ziehscht de Anzuch an un binnscht es Krawattl um!“-kommandiert es Weib. „Bischt teppert? Iwergschnappt oder sogar bschwipst?“ „Geduld dich halt, bis mer ins Restaurant kumme. Ich han e Tisch bstellt!“

So staat un staat is de Sepp ins Studiere kumm, hat derweil brav es Krawattl umgebunn – es war em jetz nit allesens. So e Tach kann un derf mer doch nit vergesse! Er hat hoch un heilich versproch: „Vun nun an merk ich mers. Un in zehn Jahr, awer dann Aldi!“